



Nefndasvið Alþingis  
b.t. Kristínar Benediktsdóttur  
Austurstræti 8-10  
101 Reykjavík

Reykjavík, 15. desember 2016

**Efni: Umsögn um mál nr. 6, frumvarp til laga um breytingu á lögum um Lífeyrissjóð starfsmanna ríkisins.**

Með tölvubréfi dagsettu 14. desember sl. var Sjúkraliðafélagi Íslands, SLFÍ, sent ofangreint frumvarp til umsagnar. SLFÍ er ekki sátt við frumvarpið og gerir eftirfarandi athugasemdir:

1. Frestur til athugasemda er óvenju stuttur. Um er að ræða afar stórt hagsmunamál, sem miklar deilur eru um og er frestur þessi því allt of stuttur. Athugasemdir sem hér fara á eftir eru því hvorki tæmandi né eins ítarlegar og æskilegt væri.
2. Frumvarpið skerðir lífeyrisréttindi opinberra starfsmanna. Lífeyrisréttindi eru stjórnarskrárvarin eignarréttur og verður ekki einhliða tekinn af með lagabreytingu. Að þessu hefur greinilega ekki verið hugað í frumvarpinu og alls ekki tryggt að lífeyrisréttindi skerðist ekki.
3. Í frumvarpinu er mikið gert úr samráði við bandalög opinberra starfsmanna, en ljóst er að ekki er farið eftir því samkomulagi sem undirritað var 19. september. Í samkomulaginu er gert ráð fyrir að breyta lífeyriskerfinu til framtíðar jafnframt því sem launamunur milli almenna vinnumarkaðarins og hins opinbera yrði jafnaður. Vinna við jöfnun launamunar er hins ekki hafin, en vinna hefði þurft þessi mál samhliða Það hallar því verulega á sjóðfélaga/opinbera starfsmenn í þessu frumvarpi. SLFÍ mótmælir því að ekki er gengið frá leiðréttingu launa samhliða breytingu á lífeyrisréttindum. Frumvarpið í núverandi mynd felur í sér einhliða kjara- og réttindaskerðingu. Frumvarpið, sem nú er til umsagnar gengur mun skemmra en það sem fyrir var í að uppfylla samkomulagið.
4. SLFÍ ásamt fleiri félögum innan BSRB fengu Gísla Tryggvason hdl, að gefa álit á því hvort: rétt sé og jafnvel lagalega skylt að bera samkomulag ríkis, sveitarfélaga og

bandalaga opinberra starfsmanna undirritað 19. september undir bindandi allsherjaratkvæðagreiðslu hlutaðeigandi. Gísli komst að þeirri niðurstöðu að af fordæmum, langri hefð um framkvæmd kjara- og réttindamála opinberra starfsmanna og þróun á sviði vinnumarkaðsréttar og stjórnskipunarréttar leiði að skýra beri 2. mgr. 75. gr. stjórnarskrárinnar um samningsrétt um „réttindi tengd vinnu“ þannig að verulegar efnisbreytingar um mikilvæg réttindamál launafólks, svo sem lífeyrisréttindi, skuli afgreiddar endanlega með bindandi allsherjaratkvæðagreiðslu. Talið er að vanhöld á þessu gæti leitt til ógildingar ef á það reyndi með réttum hætti,“ segir ennfremur í lögfræðialitinu.

5. SLFÍ tekur að öllu leyti undir athugasemdir Félags íslenskra náttúrufræðinga dagsett 3. október 2016. [Sjá umsögn](#). Tökum einnig undir umsögn við núverandi frumvarp frá Félagi prófessora við ríkisháskóla [Sjá umsögn](#)
6. Eins og í umsögn félagsins 4. október 2016 kom fram er sjúkraliðastéttin 98% konur. Starf sjúkraliða er gríðarlega krefjandi andlega og líkamlega og nánast allir starfandi í vaktavinnu. Sjúkraliðafélag Íslands hefur frá upphafi verið á móti hækkun lífeyristökualdurs og skerðingu á lífeyrisréttindum opinberra starfsmanna.

Félagið hefur í langan tíma unnið að því að fá samþykka lagabreytingu þess efnis að sjúkraliðar geti hafið lífeyristöku við 65 ára aldur. Sjúkraliðar ná ekki að vinna sér inn fullan lífeyri á starfsævinni, þar sem þeir ýmist fá ekki fulla vinnu eða geta ekki unnið fulla vinnu sökum erfðis starfsins. Frumvarpið mun skerða sjúkraliða enn frekar. Krafa félagsins hefur verið að um sjúkraliða gildi sömu réttindi og hafa gilt um lögreglumenn og (fangaverði í „skúffuskjali“), þ.e. að þeir ljúka störfum 65 ára, en eru reiknaðir upp eins og þeir hefðu unnið til 70 ára aldurs. Mismunandi reglur að þessu leyti eru í raun mismunun gagnvart kvennastétt, sem brýn ástæða er til að lagfæra. Hvorki frumvarpið né samkomulagið taka á þessu með neinum hætti, þrátt fyrir samþykktir síðasta þings BSRB og svokallaðs 10 punkta vinnuskjals sem unnið var af báðum aðilum.

7. Fjölmargir sjúkraliðar eru sjóðfélagar í A-deild LSR og starfa hjá fyrirtækjum og stofnunum, sem eru fjármagnaðar af ríkinu samkvæmt þjónustusamningum (sjálfseignastofnanir), en eru hvorki ríkisstofnanir né stofnanir sveitarfélaga. Ástæða hefði verið til að þær stofnanir væru með í útreikningum og fjárframlögum ríkisins til lífeyrisauka.
8. SLFÍ gerði athugasemdir við að í frumvarpinu sem lagt var fram í október var gerður greinarmunur á rétti „virkra greiðandi sjóðfélaga“ og annarra sjóðfélaga. SLFÍ lagði áherslu á að jafnræðis hafi ekki verið gætt gagnvart öllum. Í núverandi frumvarpi (máli 6) hallar enn frekar á sjóðsfélaga þar sem einungis þeir sem orðnir eru 60 ára eigi að halda áunnum réttindum.

Virðingarfyllst,

f. h. SLFÍ,

Kristín Á Guðmundsdóttir, formaður